

- प्रधानमंत्री नरेन्द्र मोदी रा जन्मदिन रे मौके आज सेवा पर्व सरू व्ह्यो-प्रदेश मांय भांत-भांत रा कार्यक्रम।
- राज्य मांय आज शहरी अर ग्रामीण सेवा शिविर सरू व्ह्या- मुख्यमंत्री कह्यो- आं रे मार्फत समाज रा आखिरी छोर रा मिनख ताई साता पूगेला।
- प्रधानमंत्री आज देश भर मांय चलाया जावण वाळा स्वस्थ नारी, सशक्त परिवार अभियान अर आठवां राष्ट्रीय पोषण माह शिविर री सरूआत कीनी।
- केन्द्रीय वित्त मंत्री निर्मला सीतारमन कह्यो-जीएसटी सुधारां ऊँ जनता रा करीब दो लाख करोड़ रुपया बचेला।

000

प्रधानमंत्री नरेन्द्र मोदी रा जन्मदिन रे मौके आज सेवा पर्व री सरूआत व्ही। ई रा तैत पूरा राज्य मांय केई कार्यक्रम राख्या जा रह्या है। मुख्यमंत्री भजन लाल शर्मा जयपुर रा मालवीय नगर ऊँ शहरी सेवा शिविर री सरूआत कीनी। ई मौके वे कह्यो के प्रधानमंत्री मोदी री दूरदर्शी सोच देश रा करोड़ों लोगों री जिन्दगी मांय खुशहाली लायी है। वे कह्यो के प्रधानमंत्री नरेन्द्र मोदी री अगुवाई मांय लारला 11 साल मांय देश रा भला रा ऐतिहासिक काम व्ह्या है अर भारत दुनिया री चौथी मोटी माली व्यवस्था बण ग्यो है। मुख्यमंत्री कह्यो के श्री मोदी री जन सेवा री भावना ऊँ सीख ले र राज्य सरकार शहरी सेवा शिविर लगा रही है। श्री शर्मा कह्यो के आं शिविरां रे मार्फत आखिरी छोर रा मिनखा ताई आराम पूगायो जावेला।

000

मुख्यमंत्री शहरी सेवा शिविर 2025 री मार्गदर्शिका रो विमोचन कीनो अर प्रधानमंत्री आवास योजना रो फायदो लेवण वाळां ने चैक अर दूजी योजनावां रो फायदो लेवण वाळां ने पट्टा दीना। श्री शर्मा आज ही जयपुर कने बस्सी ऊँ ग्रामीण सेवा शिविरां री सरूआत ई कीनी। आं रे जरिये जनता न्यारी-न्यारी सरकारी योजनावां रो फायदो लेवण सारू अर्जियां पेश कर सकेला अर वां अर्जियां ने मंजूरी देवण रा काम कर्या जावेला। ई दौरान भांत-भांत री सेवावां अर सुबीता एक ही ठौड़ मुहैया करया जावेला।

000

प्रधानमंत्री मोदी रा जन्मदिन रे मौके आज मुख्यमंत्री भजनलाल शर्मा जयपुर रा जवाहर कला केन्द्र मांय 'नमो प्रदर्शनी' रो उद्घाटन कीनो। ई प्रदर्शनी मांय प्रधानमंत्री मोदी रा मेक इन इंडिया, डिजिटल इंडिया, वोकल फॉर लोकल अर आत्मनिर्भर भारत सरीखा नवाचारां अर योजनावां माथे आधारित स्टॉल्स लगायी ज्यी है। ई सागे ई ऑपरेशन सिंदूर अर अयोध्या मांय बणायी ज्यो राम मंदिर सरीखा ऐतिहासिक फैसलां रा बारा मांय ई प्रदर्शनी लगायी ज्यी है। मुख्यमंत्री प्रदर्शनी ने निरख्यां पाछे पैली वाळा फौजियां, नौजवान कारोबारियां अर कार्यकर्तावां सागे बातचीत कीनी। कार्यक्रम मांय मोदी स्टोरी श्रृंखला रा तहत जनता रा नुमाइन्दां रा प्रधानमंत्री मोदी सागे सीख देवण वाळा अनुभवां माथे आधारित नान्ही फिल्म ई बतायी ज्यी।

000

आज ही सेवा पखवाड़ो ई सुरू व्हयो। ई मौके जयपुर रा विद्याधर नगर मांय खूनदान अर ईलाज रा शिविर लगायी ज्या। इण मांय उपमुख्यमंत्री दिया कुमारी ई खूनदान कीनी। ई मौके दिया कुमारी कह्यो के सेवा भाव ऊँ ई समाज मांय सकारात्मक बदलाव आ सके है। वे जनता ऊँ मेडिकल कैम्प, सफाई अभियान अर जागरूकता ऊँ जुड़या कार्यक्रमां मांय भागीदारी करण री अपील कीनी। उपमुख्यमंत्री सगळा ऊँ खूनदान करण अर जरूरतमंद लोगां री मदद सारु आगे आवण बाबत् ई कह्यो।

000

जयपुर रा सीतापुरा मांय अखिल भारतीय तेरापंथ युवक परिषद् री ओर ऊँ मेगा ब्लड डोनेशन ड्राइव राखी ज्यो। मुख्यमंत्री भजन लाल शर्मा शिविर रो दौरा कर र खूनदान करण वाळां सागे मुलाकात कीनी। वे रक्तदान महादान रो संदेश ई दीनी।

000

केंद्रीय कानून मंत्री अर्जुनराम मेघवाल बीकानेर मांय सेवा पखवाड़ा कार्यक्रमां रा तैत साइकिल रैली अर ट्यूब डे थार री सुरूआत कीनी। इण मांय मोटी तादाद मांय साइकिल चलावण वाळा उमाव सागे सिरकत कीनी।

000

लोकसभा अध्यक्ष ओम बिरला आज प्रधानमंत्री नरेन्द्र मोदी रा जन्मदिन रे मौके सुरू करी ज्या सेवा पखवाड़ा रा तैत कोटा मांय राखी ज्या स्वच्छता अभियान मांय शामिल व्ह्या। ई मौके वे कह्यो के ई पखवाड़ा मांय देशभर रा करोड़ा लोग सेवाभाव ऊँ जुड़ रह्या है, जो प्रधानमंत्री री जिन्दगी ऊँ मिली प्रेरणा रो प्रतीक है। लोकसभा अध्यक्ष शक्तिनगर मांय सफाई कर कर र साफ-सफाई राखण रो संदेश दीनी। ई सागे ई वे कोटा नगर निगम रा सगळा वार्ड मांय स्वच्छता अभियान री सुरूआत कीनी। श्री बिरला थेकड़ा मांय राखी ज्या नमो स्वास्थ्य जांच अर सुपोषण शिविर मांय ई शामिल व्ह्या। लोकसभा अध्यक्ष रामगंजमण्डी मांय सुपोषित माँ अभियान रा तीजा दौरा री सुरूआत ई कीनी। ई मौके आस वाळी लुगाइयां ने पोषण किट दिया ज्या। ई पाछे खबरनवीसां सागे बातचीत करता थकां श्री बिरला प्रधानमंत्री मोदी री जिन्दगी ने समर्पण रो जीवन बतायो अर कह्यो के श्री मोदी वां री जिन्दगी जनता री सेवा मांय लगा दीनी।

000

प्रधानमंत्री नरेन्द्र मोदी रा जन्मदिन रे मौके आज ऊँ राष्ट्रीय पुरस्कार ऊँ नवाजी ज्यी फिल्म "चलो जीते हैं" लगभग 500 सिनेमाघरां मांय अर स्कूलां मांय बतायी जा रही है। आ फिल्म 2 अक्टूबर ताई बतायी जावेला। ई मौके 'चलो जीते हैं: सेवा का सम्मान' पहल रा तैत फिल्म रा दरसाव पाछे स्कूलां अर समाज रा 'अणबोल्या नायकां चौकीदार, सफाई कर्मचारी, ड्राइवर अर चतुर्थ श्रेणी कर्मचारियां रो मान कर्यो जावेला।

000

सेवा पखवाड़ा रा सिलसिला मांय क्षेत्रीय समाचार एकांश, जयपुर री ओर ऊँ आज रात 8 बज्यां खास परिचर्चा प्रसारित करी जावेला। आप 101.2 एफएम. चैनल माथे आ परिचर्चा सुण सको हो।

000

प्रधानमंत्री नरेन्द्र मोदी आज मध्यप्रदेश रा धार ऊँ देश भर मांय चलाया जावण वाळा स्वस्थ नारी, सशक्त परिवार अभियान अर आठवां राष्ट्रीय पोषण माह शिविर री सुरूआत कीनी। प्रधानमंत्री जिला रा भैंसला गाँव मांय देश रा सब ऊँ मोटा पीएम मित्र पार्क री नींव रखी। ई मौके श्री मोदी मातृ वन्दना योजना रा तैत 15 लाख ऊँ बत्ती महिलावां ने माली मदद री रकम ई भेजी। श्री मोदी महिलावां ऊँ स्वस्थ नारी सशक्त परिवार अभियान रा तैत लगाया जा रह्या स्वास्थ्य शिविरां मांय जांच करावण री अरज कीनी। वे कह्यो के आवता त्यौहारां रे दौरान देश मांय बणी चीजां ई खरीदी जावणी चाहिजे। श्री मोदी कारोबारियों ऊँ भारत मांय बणी चीजां ई बेचण री अपीली कीनी।

000

प्रधानमंत्री रा ई कार्यक्रम मांय राज्यपाल हरिभाऊ बागडे जयपुर रा राजभवन ऊँ ऑनलाइन तरीका ऊँ जुड्या। ई मौके वे कह्यो के ओ अभियान आखा देश मांय महिलावां, किशोरियां अर बच्चां सारू स्वास्थ्य अर पोषण सेवावां ने मजबूत बनावण री दिशा मांय ऐतिहासिक कदम है।

000

केन्द्रीय वित्त मंत्री निर्मला सीतारमन कह्यो है के वस्तु अर सेवा कर ऊँ जुड्या सुधारां ऊँ जनता रा करीब दो लाख करोड़ रुपया बचेला। वे आज विशाखापत्तनम मांय आगला बगत रा जीएसटी सुधारां रा बारा मांय राखी ज्या आउटरीच कार्यक्रम मांय बोल रही ही। वित्त मंत्री कह्यो के 5 अर 18 फीसदी री दो रेट वाळा जीएसटी सिस्टम ऊँ लोगों री रोजीना री जरूरतां ऊँ जुड्या जरूरी सामान माथे बोझ कम व्हेला।

000

सलूमबर जिला रा किसानां सारू सीताफल री खेती आमदनी बधावण रो बेहतर जरियो बण रही है। पाणी री कम जरूरत वाळा सीताफल री उपज पहाड़ी अर कम उपजाऊ हलका मांय ई आसानी ऊँ ली जा सके है। कोटड़ा, फलासिया अर चित्तौड़ री डूंगरियां मांय सीताफल री चोखी उपज मिल रही है। उद्यान विभाग रा उप निदेशक पुरुषोत्तम लाल भट्ट बतायो के सीताफल रो पौधो बरसात रा पाणी ऊँ आसानी ऊँ पनप जावे है। वे बतायो के दो बीघा हलका मांय इण री खेती करण वाळा किसान उद्यान विभाग ऊँ सब्सिडी ई ले सके है।

000

पुलिस महानिदेशक राजीव कुमार शर्मा आज बाड़मेर मांय सरहदी हलकां रो दौरा कीनो। वे गडरा रोड़ पुलिस थाणा मांय काम-काज रो जायजो लीनो। ई पाछे वे पाकिस्तान ऊँ लाग्योड़ी सरहद माथे बणी मुनाबाव चौकी जा र बी.एस.एफ. रा अहलकारां सागे मुलाकात कर र सरहदी हलकां मांय हिफाजती इन्तजामात री जाणकारी लीनी अर बी.एस.एफ. रा जवानां सागे बातचीत कीनी। श्री शर्मा बीएसएफ रा जवानां रा अनुशासन अर हिम्मतवाळा कामां री सराहवणा कीनी। वे ऑपरेशन सिंदूर रे दौरान फौजी जवानां री बहादुरी री तारीफ करता थकां कह्यो के राजस्थान पुलिस हमेशा बीएसएफ री मदद सारू तैयार है।

000